

# Estatutos

## **CAPÍTULO I: DA ASOCIACIÓN EN XERAL**

### Artigo 1. Denominación e natureza.

Coa denominación de **LABRA (Asociación Profesional Galega de Construción de Instrumentos Musicais)**, constitúese unha entidade ao amparo da Lei Orgánica 1/2002, de 22 de marzo, e normas complementarias, con capacidade xurídica e plena capacidade de obrar, carecendo de ánimo de lucro.

### Artigo 2. Personalidade e capacidade

A asociación constituída ten personalidade xurídica propia e plena capacidade de obrar, podendo realizar todos aqueles actos que sexan necesarios para o cumprimento da finalidade para a que foi creada, con suxeición ao establecido no ordenamento xurídico.

### Artigo 3. Domicilio

A Asociación establece o seu domicilio social na Rúa Margaridas, número 7, piso 4º dereita, código postal 15008, A Coruña.

Dito domicilio social poderá trasladarse cando así se decida en Asamblea Xeral.

### Artigo 4. Ámbito de actuación

O ámbito territorial no que a asociación vai desenvolver principalmente as súas actividades é o da Comunidade Autónoma Galega.

### Artigo 5. Duración

A asociación constitúese por tempo indefinido e rexerase segundo os principios democráticos contidos no marco da Constitución e o resto do ordenamento xurídico. Só se disolverá, conforme a estes estatutos, pola vontade dos asociados e das asociadas expresada na reunión extraordinaria ou polas causas previstas na lexislación vixente.

## Artigo 6. Fins da Asociación.

A existencia desta Asociación ten como fins:

1. A creación dunha rede viva entre todas aquelas persoas que se dedican profesionalmente á construción, reparación e restauración de instrumentos musicais e outras persoas afíns á Asociación.
2. Compartir coñecementos, recursos e experiencia entre os diferentes membros da asociación. Promoción da formación individual e colectiva.
3. Promover o desenvolvemento sostible, a conciencia ecolóxica e o crecemento económico dunha maneira éticamente responsable.
4. Concienciar e educar aos clientes sobre o valor da profesión que esta asociación representa.
5. Ser un punto de referencia para calquera persoa ou institución interesada na construción de instrumentos musicais.
6. A promoción e regulación laboral da profesionalidade do sector.
7. Informar a calquera organismo, asociación ou colectivo que precise dos servizos de construción, reparación, ou restauración de instrumentos musicais das vantaxes que ten contar cun profesional que preste estes servizos de forma regular dende o punto de vista fiscal e laboral.
8. Organización eventos, establecemento dunha presenza en internet e noutros medios, apoio doutros proxectos afíns.
9. A interlocución coas Administracións para as demandas e necesidades do sector.
10. Asesoramento laboral, fiscal e técnico para os membros.
11. Promover e fomentar a igualdade de xénero no sector.
12. Engadir valor á cadea produtiva da industria forestal e da madeira galega.
13. Engadir valor á industria cultural galega.

## **CAPÍTULO II: DAS PERSOAS ASOCIADAS**

### Artigo 7. Tipos de membros e requisitos

- A. Socios e socias
- B. Socios e socias de honra
- C. Persoas e entidades colaboradoras

1. Poderán ser socios/as da Asociación todas aquelas persoas con capacidade de obrar que teñan interese no desenvolvemento dos fins da Asociación.
2. Para ser socio/a será requisito imprescindible dedicarse profesionalmente á construción, reparación e restauración de instrumentos musicais.  
O prestador/a desta actividade, polo exercicio da mesma, deberá estar afiliado/a no RETA (Régime Especial de Traballadores Autónomos), Régime Xeral da Seguridade Social ou calquera outro Régime de Previsión Social ou Mutualidade, así como estar de alta no epígrafe de IAE correspondente, se procede. Esta situación xustificárase anualmente cos recibos bancarios de pago da cota de autónomos, contrato laboral, vida laboral e alta na Seguridade Social da actividade que esta Asociación representa.  
Dende a asociación non se entra a valorar titulacións nin outras cuestións persoais, senón que o punto de partida é a legalidade fiscal e laboral da actividade dos asociados/as.
3. O domicilio fiscal das persoas asociadas deberá estar na Comunidade Autónoma Galega.
4. As persoas físicas deben ser maiores de idade con capacidade de obrar e non estar suxeitas a inhabilitación ou condición legal para o exercicio do dereito.
5. As persoas xurídicas de natureza asociativa requirirán o acordo expreso do seu órgano competente, e as de natureza institucional, o acordo do seu órgano reitor.
6. A solicitude para ser socio ou socia deberá ser revisada pola Xunta Directiva e aceptada por maioría simple.
7. Poderá ser colaborador/a calquer persoa ou entidade que queira apoiar á Asociación, a súa filosofía e os seus obxectivos.
8. A condición de socio/a de honra será proposta e concedida pola Xunta Directiva por votación unánime.

#### Artigo 8. Perda da condición de persoa asociada

1. A condición de asociado ou asociada pérdese:
  - a. Por vontade propia, que se fará efectiva mediante presentación de renuncia por escrito ante a Xunta Directiva e dirixida á secretaría da asociación. A renuncia terá efectos desde a data da súa presentación.
  - b. Por falta de pagamento de dúas cotas de asociado, que será efectiva desde a notificación do acordo adoptado pola Xunta Directiva ao interesado. A persoa que perdese a súa condición de asociada por este suposto poderá

ser rehabilitada se no prazo de seis meses desde a notificación abona as cotas pendentes de pago.

- c. Por incumprimento dos presentes estatutos ou dos acordos validamente adoptados polos órganos da asociación, así como pola realización de accións que prexudiquen gravemente os intereses da asociación.
  - d. Por estar de baixa no RETA ou no réxime xeral da Seguridade Social durante mais de catro meses ao ano. O/a socio/a comprométese a comunicar esta situación á Xunta Directiva e pasaría a ser colaborador/a. Levarase a cabo una verificación anual que acredite a continuidade como socio/a.
  - e. Por falecemento da persoa física ou extinción da persoa xurídica.
2. A expulsión de asociados e asociadas nos supostos dos apartados b), c) e d) do parágrafo anterior será acordada pola Xunta Directiva, logo da audiencia da persoa interesada. O acordo de expulsión deberá ser ratificado pola Asemblea Xeral Extraordinaria e contra a súa resolución poderase recorrer ante a xurisdición ordinaria.

#### Artigo 9. Dereitos

1. 1. Os/as socios/as teñen os seguintes dereitos:
  - a. Participar nas actividades da asociación.
  - b. Ser electoras e elixibles para os cargos dos órganos de goberno.
  - c. Participar nas asembleas con voz.
  - d. Participar nas asembleas con voto.
  - e. Recibir información da composición dos órganos de goberno e representación da asociación, do seu estado de contas e do desenvolvemento da súa actividade.
  - f. Acceder á documentación da asociación a través dos órganos de representación.
  - g. Ser oídas con carácter previo á adopción de medidas disciplinarias contra elas e ser informadas dos feitos que dean lugar ás ditas medidas, debendo motivarse o acordo que, no seu caso, imponha a sanción.
2. Non poderán exercer o dereito de sufraxio activo e pasivo as persoas asociadas que non estean ao día no pagamento das cotas sociais.
3. As/os socias/os de honra e as persoas e entidades colaboradoras terán os mesmos dereitos a excepción dos que figuran nos apartados b), d), e), f) do artigo 9.1. Non terán dereito a asistir a actividades mercantiles para as que sexa necesario cumprir os requisitos do artigo 7.

## Artigo 10. Obrigas

Son obrigas das persoas asociadas:

- a. Cumprir os presentes estatutos e os acordos validamente adoptados polos órganos de goberno e representación da asociación.
- b. Pagar as cotas que de conformidade cos estatutos se establezan.
- c. Desempeñar as obrigas inherentes aos cargos para os que foron elixidas.
- d. Presentar a documentación necesaria que requira a Asociación para a participación nas actividades que esta organice.
- e. Presentar ao final do ano natural polo menos 8 recibos bancarios do pago da cota de autónomos ou contrato laboral no caso que corresponda, e a alta na Seguridade Social da actividade que esta Asociación representa.

## **CAPÍTULO III: DOS ÓRGANOS DA ASOCIACIÓN**

### Artigo 11. Organización da asociación

Os órganos de goberno e representación da asociación son a Asemblea Xeral e a Xunta Directiva, que adoptarán os seus acordos de conformidade co principio maioritario ou de democracia interna.

### Artigo 12. Asemblea Xeral

A Asemblea Xeral é o órgano supremo de goberno da asociación e está integrada por todas as persoas asociadas.

### Artigo 13. Reunións: clases e convocatoria

1. As reunións da Asemblea Xeral poden ser ordinarias ou extraordinarias. A reunión ordinaria celebrarase como mínimo unha vez o ano dentro dos catro meses seguintes ao peche do exercicio económico. As reunións extraordinarias celebraranse cando as circunstancias o aconsellen, cantas veces o acorde a Xunta Directiva ou cando o soliciten por escrito o 10% das persoas asociadas.
2. As convocatorias realizaranse por escrito, sinalando o lugar, día e hora da reunión, así como a orde do día. Entre a publicación ou notificación da convocatoria e a data

da celebración da asemblea en primeira convocatoria debe mediar como mínimo un prazo de quince días naturais.

3. A documentación e información sobre as materias incluídas na orde do día estará a disposición das persoas asociadas na secretaría da asociación, cunha antelación mínima de quince días naturais á celebración da asemblea.

#### Artigo 14. Constitución e quórum de convocatoria

As Asembleas Xerais, tanto ordinarias como extraordinarias, quedarán validamente constituídas sempre que concorran un terzo das persoas asociadas presentes ou representadas na primeira convocatoria ou, transcorrida media hora, en segunda convocatoria, con calquera número de asistentes con dereito a voto. En todo caso, terán que estar presentes as persoas que sexan membros da Xunta Directiva ou persoas que as substitúan.

#### Artigo 15. Facultades da Asemblea Xeral ordinaria

Serán competencias da Asemblea Xeral ordinaria:

- a. Examinar e aprobar as contas e balances do exercicio anterior.
- b. Aprobar os orzamentos de ingresos e gastos para cada exercicio, e o plan de actividades.
- c. Examinar e aprobar as cotas das persoas asociadas, a proposta da Xunta Directiva.
- d. Elixir e cesar as persoas integrantes da Xunta Directiva.
- e. Aprobar a incorporación ou separación a unha federación.
- f. Solicitar a declaración de utilidade pública da asociación.
- g. Aprobar o regulamento de réxime interno da asociación.

#### Artigo 16. Facultades da Asemblea Xeral extraordinaria

Serán competencias da Asemblea Xeral extraordinaria:

- a. Modificar os estatutos da asociación, incluído o cambio de domicilio.
- b. Acordar a transformación da asociación.
- c. Acordar a fusión da asociación.
- d. Acordar a disolución da asociación e designar as persoas liquidadoras.

- e. As que sendo competencia da Asemblea Xeral ordinaria, por razóns de urxencia ou necesidade, non poidan agardar a súa convocatoria.
- f. Tódalas non conferidas expresamente á Asemblea Xeral ordinaria ou a Xunta Directiva.

#### Artigo 17. Adopción de acordos

1. Os acordos da Asemblea Xeral adoptaranse por maioría simple das persoas presentes ou representadas, cando os votos afirmativos superen aos negativos, non sendo computables a estes efectos os votos nulos, en branco nin as abstencións.
2. Será necesaria a maioría cualificada dos votos emitidos, que resultará cando os votos afirmativos superen os dous tercios das persoas presentes ou representadas, para adoptar os seguintes acordos:
  - a. Designación de membros da Xunta Directiva.
  - b. Acordo para constituír federacións e para integrarse ou separarse delas.
  - c. Disolución da asociación.
  - d. Modificación dos estatutos, incluído o cambio de domicilio social.
  - e. Disposición ou alleamento de bens.
  - f. Contratación de asalariados.
3. Os acordos adoptados conforme ós preceptos anteriores obrigarán a todas as persoas asociadas, incluso as non asistentes.

#### Artigo 18. A Xunta Directiva: Composición

1. A Xunta Directiva é o órgano de representación que xestiona e representa os intereses da Asociación de acordo coas disposicións e directivas da Asemblea Xeral. Estará formada por: Presidente/a, Vicepresidente/a, Secretario/a, Tesoureiro/a e Vogais, designados pola Asemblea Xeral entre as persoas asociadas maiores de idade, en pleno uso dos seus dereitos civís que non estean incursas en motivos de incompatibilidade legalmente establecidos.  
A Xunta Directiva estará formada por socios e socias. Primará a presenza de directivos representen todas as tipoloxías de instrumentos posibles. De non ser posible as anteriores premisas, a Xunta formarase polos/as asociados/as que voluntariamente o desexen e sexan aceptados/as segundo se regula nos presentes estatutos.
2. A duración do seu mandato será de dous anos, podendo ser obxecto de sucesivas reeleccións.

3. Os cargos que compoñen a Xunta Directiva serán desempeñados de forma voluntaria e gratuíta, sen prexuízo do dereito ao reembolso dos gastos debidamente xustificadas en que poidan incurrir por actuacións relacionadas coa asociación.
4. Os cargos da Xunta Directiva cesarán na súa función por:
  - a. Morte ou declaración de falecemento da persoa física ou extinción da persoa xurídica.
  - b. Incapacidade, inhabilitación ou incompatibilidade, de acordo co establecido no ordenamento xurídico.
  - c. Resolución xudicial.
  - d. Renuncia voluntaria.
  - e. Perda da condición de persoa asociada.
  - f. Incumprimento das obrigas que tiveran encomendadas.
  - g. Transcurso do período do seu mandato. Neste caso e en tanto non se proceda á elección da nova Xunta Directiva, aquela continuará en funcións ata a designación dos novos membros.
5. De producirse vacantes na Xunta Directiva, estas serán desempeñadas provisoriamente polos restantes membros, ata a elección definitiva pola Asemblea Xeral.

#### Artigo 19. Reunións e acordos da Xunta Directiva

1. A Xunta Directiva será convocada polo presidente, a iniciativa propia ou a petición de calquera dos seus compoñentes.
2. Para estar validamente constituída deberán estar presentes a metade máis un dos seus membros e, en todo caso, o presidente e o secretario ou as persoas que os substitúan.
3. Para que os acordos da Xunta Directiva sexan válidos, deberán ser adoptados pola maioría simple de votos dos asistentes. Os empates serán dirimidos mediante voto de calidade do Presidente.

#### Artigo 20. Facultades da Xunta Directiva

A Xunta Directiva terá as seguintes atribucións:

- a. Programar e dirixir as actividades asociativas.
- b. Levar a xestión administrativa e económica da asociación.
- c. Executar os acordos da Asemblea.

- d. Someter á aprobación da Asemblea Xeral o orzamento anual de ingresos e gastos, así como o estado de contas do ano anterior.
- e. Convocar e fixar as datas das Asembleas.
- f. Propoñerlle á Asemblea Xeral a fixación de cotas ordinarias e extraordinarias para as persoas asociadas.
- g. Designar as comisións de traballo ou seccións que se estimen oportunas para o bo funcionamento da asociación.
- h. Ditar normas interiores de organización e exercer cantas funcións non estean expresamente asignadas á Asemblea Xeral.
- i. Resolver as solicitudes de ingreso de asociados/as.
- j. Propoñer o plan de actividades da asociación á Asemblea Xeral para a súa aprobación, impulsando e dirixindo as súas tarefas.
- k. Resolver os procedementos disciplinarios que se instrúan. A Xunta directiva poderá esixir en calquera momento a xustificación de alta no Réxime da Seguridade Social ou análogo a calquera dos asociados co fin de comprobar o requisito exposto no apartado 2 do artigo 7.

#### Artigo 21. Obrigas documentais

A asociación disporá dos seguintes documentos, que estarán a disposición de todas as persoas asociadas:

- a. Unha relación actualizada de asociados e asociadas.
- b. Documentación contable que permita obter a imaxe fiel do patrimonio, do resultado e da situación financeira da entidade, así como das actividades realizadas. Tal contabilidade levarase de conformidade coa normativa específica que resulte de aplicación.
- c. Inventario dos seus bens.
- d. Libro de actas das reunións dos seus órganos de goberno e representación.

#### Artigo 22. Presidente/a

A persoa que ostenta a presidencia terá as seguintes atribucións:

- 1. Representar legalmente a asociación perante calquera organismo público ou privado.
- 2. Convocar e presidir as sesións que celebre a Xunta Directiva e a Asemblea Xeral, dirixir as deliberacións dunha e outra, e decidir con voto de calidade os casos de empate de votos.

3. Ordenar a execución dos acordos adoptados pola Xunta Directiva e a Asemblea Xeral.
4. Ordenar os pagamentos acordados validamente.
5. Asinar as actas, certificados, pagamentos e outros documentos da asociación xunto coa persoa que ostenta a secretaría ou membro da Xunta Directiva a quen lle corresponda a elaboración do documento de que se trate.

#### Artigo 23. Vicepresidente/a

A persoa que ostente a vicepresidencia realizará as funcións da presidencia nos casos de ausencia ou enfermidade, podendo tamén actuar en representación da asociación nos supostos en que así se acorde pola Xunta Directiva ou pola Asemblea Xeral.

#### Artigo 24. Secretario/a

1. A persoa que ostenta a secretaría terá as seguintes atribucións:
  - a. Tramitar as solicitudes de ingreso na asociación e formalizar as inscricións de altas e baixas das persoas asociadas.
  - b. Dirixir as actividades sociais e a administración da asociación.
  - c. Formalizar as convocatorias de reunión por orde da presidencia e redactar as actas correspondentes.
  - d. Expedir certificacións dos acordos co visto e prace do presidente/a, así como emitir informes.
  - e. Redactar e actualizar o inventario de bens da asociación.
  - f. Custodia do arquivo de libros e documentos da asociación.
  - g. Cumprir coas demais obrigas documentais nos termos que legalmente corresponda.
2. A persoa que ostenta a secretaría, nos casos de ausencia ou enfermidade será substituída por outro membro da Xunta Directiva designado pola persoa que ostenta a Presidencia.

#### Artigo 25. Tesoureiro/a

1. A persoa que ostenta a tesourería terá as seguintes atribucións:
  - a. Recadar, custodiar e investir os fondos pertencentes á Asociación na forma acordada pola Xunta Directiva e a Asemblea Xeral.

- b. Intervir coa súa sinatura todos os documentos de cobros e pagos co visto e conforme da presidencia.
- c. Dar cumprimento ás ordes de pagamento que expida a persoa que ostenta a presidencia.
- d. Elaboración do anteproxecto de orzamentos para a súa aprobación.
- e. Levar os libros de contabilidade da asociación e elaborar as contas anuais para a súa aprobación pola Asemblea.
- f. Calquera outra función propia de tesourería como a responsabilidade da xestión económico financeira da asociación.

#### Artigo 26. Vogais

Serán catro, e son os demais membros da Xunta Directiva. As persoas que ostentan cargos de vogais terán as seguintes atribucións:

- a. Servir de enlace entre os diferentes membros da Asociación e a Xunta Directiva.
- b. Colaborar coa Xunta Directiva na convocatoria de Asembleas.
- c. Exercer cargos de coordinación interna na Asociación (informática, prensa, correo...).
- d. Realizar aquelas outras tarefas que lles sexan encomendadas, tales como realizar programas e estudos con carácter xeral ou en áreas de actuación determinadas.

### **CAPÍTULO IV: DO RÉXIME ECONÓMICO**

#### Artigo 27. Patrimonio inicial

A Asociación no momento da súa constitución carece de Fondo Social. O peche do exercicio económico coincidirá co ano natural, e terá lugar o día 31 de decembro de cada ano.

#### Artigo 28. Recursos económicos

A asociación manterase dos seguintes recursos:

- a. As cotas periódicas das persoas asociadas.
- b. As cotas extraordinarias que propoña a Xunta Directiva e sexan aprobadas pola Asemblea Xeral.
- c. As doazóns ou subvencións que poidan conceder órganos públicos, entidades privadas ou particulares.

- d. Os ingresos que se poidan recibir polo desenvolvemento das actividades da asociación.
- e. Calquera outro ingreso admitido pola normativa vixente para actividades non lucrativas.

#### Artigo 29. Contas anuais

1. Anualmente, con referencia ao último día do exercicio económico, elaboraranse as contas anuais, expresivas da situación patrimonial e contable da asociación, así como unha memoria das actividades realizadas. Esta documentación estará a disposición das persoas asociadas, durante un prazo non inferior a 15 días ao sinalado para a súa aprobación en Asemblea.
2. A Xunta directiva levará os correspondentes libros de contabilidade, que permitan obter unha imaxe fiel do patrimonio, o resultado e a situación financeira da asociación.

#### Artigo 30. Destino de ingresos a fins da asociación

Como entidade sen ánimo de lucro, os beneficios obtidos derivados do exercicio de actividades económicas, incluídas as prestacións de servizos, destinaranse exclusivamente ao cumprimento dos fins da asociación. En ningún caso, estes beneficios poderán ser repartidos entre as persoas asociadas ou calquera outra persoa física ou xurídica con interese lucrativo.

### **CAPÍTULO V: DO REGULAMENTO DE RÉXIME INTERNO**

#### Artigo 31. Regulamento de réxime interno

Por acordo da Asemblea Xeral pode aprobarse un regulamento de réxime interno, que desenvolverá aquelas materias non contempladas directamente nestes estatutos. O funcionamento interno da asociación estará sometido ao ordenamento xurisdiccional civil.

### **CAPÍTULO VI: DISOLUCIÓN E LIQUIDACIÓN DA ASOCIACIÓN**

#### Artigo 32. Disolución

A asociación disolverase polas seguintes causas:

- a. Por acordo adoptado por maioría cualificada en Asemblea Xeral Extraordinaria.
- b. Polas causas que se determinan no art. 39 do Código Civil.
- c. Por sentenza xudicial firme.
- d. Polas demais causas que se determinen nos presentes estatutos.

### Artigo 33. Liquidación

1. Acordada a disolución da asociación, ábrese o período de liquidación, ata o fin do cal a entidade conservará a súa personalidade xurídica.
2. Os membros da Xunta Directiva no momento da disolución convértense en liquidadores, salvo designación expresa de liquidadores pola Asemblea Xeral ou por autoridade competente.
3. Corresponde aos liquidadores:
  - a. Velar pola integridade do patrimonio da asociación.
  - b. Concluir as operacións pendentes e efectuar as novas que sexan precisas para a liquidación.
  - c. Cobrar os créditos da Asociación.
  - d. Liquidar o patrimonio e pagar os acredores.
  - e. Destinar o haber resultante da liquidación aos fins previstos no acordo de disolución ou nos estatutos, que non desvirtúen a súa natureza non lucrativa.
  - f. Solicitar a baixa da asociación e cancelación de asentos rexistrals.
4. A solicitude de inscrición da disolución da asociación no rexistro acompañarase do xustificante acreditativo do destino dos bens resultantes da liquidación.

### Disposición adicional

En todo canto non estea previsto nos presentes Estatutos aplicarase a Lei Orgánica 1/2002, do 22 de marzo, reguladora do Dereito de Asociación e demais disposicións complementarias.

En A Coruña, 15 de xaneiro de 2022